



Ein cyf/Our ref: MA/L/CG/0626/19

Llŷr Gruffydd AC
Cadeirydd y Pwyllgor Cyllid
Cynulliad Cenedlaethol Cymru
Senedd.Cyllid@cynulliad.cymru

20 Medi 2019

Annwyl Llŷr,

Ysgrifennaf atoch cyn imi ymddangos gerbron eich Pwyllgor ar 25 Medi i amlinellu fy amcanion mewn perthynas â darpariaethau'r Comisiwn Etholiadol ym Mil Senedd ac Etholiadau (Cymru), ynghyd â materion perthnasol eraill.

Darpariaethau'r Comisiwn Etholiadol

Fy amcan polisi cyffredinol mewn perthynas â'r Comisiwn Etholiadol, nawr bod etholiadau i'r Cynulliad ac i lywodraeth leol yng Nghymru wedi cael eu datganoli, yw sicrhau bod gwaith y Comisiwn Etholiadol mewn perthynas â'r etholiadau hynny sydd wedi'u datganoli i Gymru yn cael ei ariannu drwy drefniadau datganoledig a'i fod yn atebol i'r Cynulliad.

Mae angen ariannu'r Comisiwn Etholiadol allan o Gronfa Gyfunol Cymru ar gyfer etholiadau datganoledig yng Nghymru. Fodd bynnag, caiff y darpariaethau ariannol craidd yn Neddf Llywodraeth Cymru 2006 ("y Ddeddf") (yn enwedig adrannau 124 a 125) eu honni ar sail tybiaeth na ddylai corff a ariennir yn uniongyrchol allan o Gronfa Gyfunol Cymru hefyd gael ei ariannu'n uniongyrchol o Gronfa Gyfunol y DU. Felly, mae cyrff a ariennir yn uniongyrchol o Gronfa Gyfunol Cymru yn atebol i'r Cynulliad yn unig, ac mae cyrff a ariennir yn uniongyrchol o Gronfa Gyfunol y DU yn atebol i Senedd y DU.

Bydd gwariant nifer o gyrff y DU yn cael ei ariannu yn y pen draw gan gyllidebau sy'n deillio o ddeddfwrfeydd datganoledig a Senedd y DU. Fodd bynnag, yn yr achosion hyn, darperir yr arian ychwanegol drwy gymorth grant yn hytrach nag yn uniongyrchol o gronfa gyfunol arall. Mae'r trefniadau hyn yn rhoi'r atebolrwydd am berfformiad cyffredinol y cyrff i'r ddeddfwrfa sy'n darparu'r rhan fwyaf o'i chyllid.

Fodd bynnag, mae sefydlu perthynas ariannu ac atebolrwydd ffurfiol rhwng y Comisiwn Etholiadol a'r Cynulliad mewn perthynas ag etholiadau datganoledig yng Nghymru yn ei

Bae Caerdydd • Cardiff Bay
Caerdydd • Cardiff
CF99 1NA

Canolfan Cyswllt Cyntaf / First Point of Contact Centre:
0300 0604400

YPCCGB@llyw.cymru / PSCGBM@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

gwneud yn ofynnol i'r Comisiwn Etholiadol dderbyn arian gan o leiaf dwy ddeddfwrfa, pob un â'i phrosesau craffu ei hun. Felly, mae hwn yn ddull gweithredu newydd nad oes cysail amlwg iddo.

Rydym wedi edrych ar bedwar dull gweithredu posibl o gael model ariannu ac atebolrwydd newydd ar gyfer y Comisiwn Etholiadol

1. *Ychwanegu'r Comisiwn Etholiadol at restr o bersonau perthnasol yn adran 124(3) o Ddeddf Llywodraeth Cymru 2006.*

Mae Adran 124(3) o'r Ddeddf yn rhestru'r "personau perthnasol" y gellir talu arian iddynt o Gronfa Gyfunol Cymru. Nid yw'r rhestr hon yn cynnwys y Comisiwn Etholiadol. Pe bai'n cael ei ychwanegu, byddai'r Comisiwn Etholiadol yn dal i dderbyn arian gan Senedd y DU am ei holl weithgareddau nad ydynt wedi'u datganoli. I bob pwrpas, felly, byddai'r Comisiwn Etholiadol yn berson perthnasol dim ond ar gyfer rhan o'i gyllid a'i swyddogaethau, a fyddai'n ddull gweithredu newydd iawn. Fel arfer, mae unrhyw "bersonau perthnasol" sy'n cael eu hychwanegu yn gyrrff newydd sy'n gweithredu yng Nghymru yn unig. I bob pwrpas, byddai'n rhaid diwygio'r Ddeddf mewn ffordd a fyddai'n cyfyngu ar statws y Comisiwn Etholiadol fel "person perthnasol" i'w waith ar etholiadau datganoledig yng Nghymru yn unig. Yn ogystal, nid oes gan y Cynulliad y cymhwysedd deddfwriaethol i ddiwygio'r rhestr yn adran 124(3) o'r Ddeddf. Yn gyffredinol, nid yw'r dewis hwn yn ddymunol ac nid oes modd ei gyflawni o fewn yr amserlenni presennol.

2. *Gwneud darpariaeth yn Neddf Pleidiau Gwleidyddol, Etholiadau a Refferenda 2000 ("PPERA") i ganiatáu i arian ar gyfer y Comisiwn Etholiadol fod yn gost uniongyrchol i Gronfa Gyfunol Cymru o dan adran 124(1)(a) o Ddeddf Llywodraeth Cymru 2006*

Mae Adran 124(1)(a) o'r Ddeddf yn caniatáu i daliad gael ei wneud o Gronfa Gyfunol Cymru os yw'r gost wedi'i rhoi i'r Gronfa honno gan unrhyw ddeddf. Fodd bynnag, y bwriad oedd defnyddio hyn dim ond lle mae'r ddeddfwriaeth yn amlwg ac yn benodol yn amlinellu'r hyn sydd i gael ei ariannu, gan nad yw taliad o'r fath yn ddarostyngedig i drefniadau pasio cynnig Cyllideb y Cynulliad oherwydd bod y costau mor uchel fel na fyddai'n briodol i'r Cynulliad graffu ac awdurdodi. Nid yw'r dull gweithredu hwn wedi cael ei ddilyn o'r blaen i ariannu gweithgareddau corff yn ehangach, ac nid hynny yw ei ddiben. Yn gyffredinol, nid yw'r dewis hwn yn briodol o safbwynt cyfansoddiadol nac ariannol.

3. *Gwneud darpariaeth yn PPERA fel bod gwneud taliad i'r Comisiwn Etholiadol o Gronfa Gyfunol Cymru yn ddeddfiad perthnasol at ddibenion adran 124(2)(b) o Ddeddf Llywodraeth Cymru*

Byddai hyn yn ei gwneud yn ofynnol rhoi gweithdrefnau ar waith i'r Comisiwn Etholiadol gael ei gylch gwaith ei hun yng nghynnig y gyllideb flynyddol y Cynulliad, wedi'i rhagnodi mewn deddfwriaeth o bosibl. Gyda'r dewis hwn, byddai'n rhaid mewnosod darpariaeth yn PPERA a fyddai'n golygu bod modd gwneud taliad i'r Comisiwn Etholiadol o Gronfa Gyfunol Cymru. Byddai hyn yn gwneud PPERA yn 'ddeddf berthnasol' at ddibenion adran 124(2)(b) o Ddeddf Llywodraeth Cymru 2006. Fodd bynnag, byddai hwn yn ddull gweithredu newydd ac nid oes cysail iddo hyd y gwyddom. Yng nghyswllt cyllid Cronfa Gyfunol Cymru, byddai arnom angen, o leiaf, gyflwyno gofynion atebolrwydd ac archwilio sy'n debyg i'r rheini sydd gan y Comisiwn Etholiadol ar gyfer Cronfa Gyfunol y DU.

4. *Y Comisiwn Etholiadol yn cael ei dalu drwy gorff sydd eisoes wedi'i restru fel person perthnasol yn adran 124(3) o Ddeddf Llywodraeth Cymru 2006*

Gan ystyried yr anawsterau sy'n gysylltiedig â'r dewisiadau eraill uchod, rydym wedi penderfynu dilyn y dull gweithredu hwn. Gan ystyried rôl Gweinidogion Cymru (y

weithrediaeth) mewn perthynas ag etholiadau i'r ddeddfwrfa, ni fyddai'n gyfansoddiadol briodol iddynt wneud hynny; yr unig gorff priodol arall sydd eisoes wedi'i restru yn adran 124(3) o Ddeddf Llywodraeth Cymru fyddai Comisiwn y Cynulliad.

Mae'r dull gweithredu hwn yn cyd-fynd â'r hyn a gynigir ar gyfer yr Alban, lle byddai'r cyfrifoldeb dros ariannu'r Comisiwn Etholiadol mewn perthynas ag etholiadau datganoledig yn yr Alban yn cael ei roi i Gorff Corfforaethol Seneddol yr Alban ("yr SPCB"), sy'n cyfateb i Gomisiwn y Cynulliad yma yng Nghymru. (Er hyn, rydym yn cydnabod bod yr SPCB yn llwybr sydd wedi'i sefydlu ar gyfer ariannu cyrff hyd braich, yn wahanol i Gomisiwn y Cynulliad.)

Yn ogystal, o dan y dewis hwn, byddai'r fframwaith presennol ar gyfer y gyllideb, craffu ac archwilio sy'n berthnasol i Gomisiwn y Cynulliad (fel un o'r pedwar perrson perthnasol y gall ei wariant gael ei dalu o Gronfa Gyfunol Cymru) yn berthnasol i gyllid y Comisiwn Etholiadol. Bydd y ddarpariaeth hon yn dal i alluogi'r Cynulliad i wneud darpariaeth o ran manylion y trefniadau craffu a phroses y gyllideb o fewn ei Reolau Sefydlog ei hun.

Mewn perthynas â'r cyllid, mae PPERA ar hyn o bryd yn darparu ar gyfer ariannu'r Comisiwn Etholiadol ag arian a ddarperir gan Senedd y DU. Fodd bynnag, mae eithriadau sy'n caniatáu i Weinidogion Cymru a Chomisiwn y Cynulliad ariannu'r Comisiwn Etholiadol ar gyfer gweithgareddau penodol. I gefnogi'r gwaith o ddilyn y pedwerydd dewis, mae Bil y Senedd yn diwygio PPERA i greu eithriad pellach a fyddai'n golygu y byddai Comisiwn y Cynulliad yn gyfrifol am ariannu gwaith y Comisiwn Etholiadol mewn perthynas ag etholiadau datganoledig yng Nghymru, yn ogystal â chadw ei allu i ariannu'r Comisiwn Etholiadol ar gyfer materion penodol fel y mae'n ei wneud yn awr, ee hyrwyddo etholiadau'r Cynulliad.

O dan y darpariaethau fel y maent wedi'u drafftio, byddai'r broses yn gweithredu fel a ganlyn:

- Diwygio PPERA i greu eithriad i'r ddarpariaeth gyffredinol sy'n golygu bod y Comisiwn Etholiadol yn cael ei ariannu gan arian a ddarperir gan Senedd y DU, fel y byddai Comisiwn y Cynulliad yn gyfrifol am ariannu'r Comisiwn Etholiadol yng nghyswllt ei waith mewn perthynas ag etholiadau datganoledig yng Nghymru.
- Yn ei Reolau Sefydlog, mae hi'n ofynnol i'r Cynulliad ddynodi corff perthnasol (a fyddai naill ai'n bwyllgor dan gadeiryddiaeth y Llywydd neu'r Dirprwy Lywydd, neu Gomisiwn y Cynulliad) i ysgwyddo cyfrifoldeb dros oruchwylio cynllun ariannu a gwaith y Comisiwn Etholiadol mewn cysylltiad â'i waith o ran etholiadau datganoledig yng Nghymru.
- Bydd Comisiwn y Cynulliad yn dal i allu ariannu'r Comisiwn Etholiadol am faterion penodol fel y mae'n ei wneud yn awr, er enghraifft hyrwyddo etholiadau'r Cynulliad. Byddai'r corff perthnasol yn craffu ar amcan gyllideb a chynllun y Comisiwn Etholiadol, gan gasglu tystiolaeth gan y Comisiwn Etholiadol ac eraill os yw hynny'n briodol (gyda'r gweithdrefnau a amlinellir yn Rheolau Sefydlog y Cynulliad).
- Byddai canlyniadau gwaith craffu y corff perthnasol yn pennu'r gyllideb ar gyfer y Comisiwn Etholiadol mewn perthynas â'i waith ar etholiadau datganoledig yng Nghymru, sy'n dod yn rhan o gyllideb Comisiwn y Cynulliad drwy broses y gyllideb flynyddol.
- Ar ôl i gyllidebau gael eu cymeradwyo, bydd Comisiwn y Cynulliad yn talu'r Comisiwn Etholiadol am ei waith mewn perthynas ag etholiadau datganoledig yng Nghymru, a bydd y Comisiwn Etholiadol yn ymgymryd â'r gwaith a amlinellir yn ei gynllun.
- Ar ddiwedd pob blwyddyn ariannol, bydd y Comisiwn Etholiadol yn llunio cyfres gyfunol o gyfrifon ar gyfer ei holl weithrediadau yn y DU, a fydd wedyn yn cael eu harchwilio gan Swyddfa Archwilio Genedlaethol. Mae Swyddfa Archwilio Cymru wedi nodi ei bod yn fodlon i'r Swyddfa Archwilio Genedlaethol barhau i ymgymryd â'r

gwaith hwn, mae darpariaeth benodol yn Atodlen 1 o PPERA sy'n amlinellu rôl y Swyddfa Archwilio Genedlaethol. Rydym yn cynnig y bydd angen cytundeb rhyng-sefydliadol a fydd yn cynnwys (ynghyd â materion eraill) darpariaethau sy'n mynd i'r afael â sut y bydd y trefniadau archwilio yn gweithio yn ymarferol.

- Yna bydd y Comisiwn Etholiadol yn cyflwyno adroddiad, yn seiliedig ar ei gyfrifon cyfunol, i'r Cynulliad.
- Yna bydd cyfrifon Comisiwn y Cynulliad ei hun yn cael eu llunio, a byddant yn cael eu harchwilio gan y Swyddfa Archwilio Cymru, yn unol â'r trefniadau presennol.

Rydym yn cydnabod bod y dull gweithredu y penderfynwyd ei ddilyn yn cyflwyno amrywiol heriau o ran gweld Comisiwn y Cynulliad yn ysgwyddo swyddogaeth newydd, ac eglurder ynghylch sut mae'r trefniadau hynny yn cyd-fynd â phroses y gyllideb a rôl y Pwyllgor Cyllid. Fodd bynnag, rydym yn ystyried bod modd rhoi sylw i'r heriau hynny drwy newidiadau i'r Rheolau Sefydlog, a bod peryglon ac anfanteision y dewisiadau eraill yn gwrthbwysu heriau ein dull gweithredu ni.

Mae trafodaethau'n parhau – gan gynnwys rhwng Llywodraeth Cymru a Thrysorlys y DU – ynghylch trosglwyddo cyllid y byddem yn ei ddisgwyl i Gronfa Gyfunol Cymru er mwyn talu costau cyllido'r Comisiwn Etholiadol am ei waith yn ymwneud ag etholiadau datganoledig yng Nghymru. Mae'r Comisiwn Etholiadol wedi cyflwyno amcangyfrifon i Gomisiwn y Cynulliad sy'n awgrymu y byddai costau blynyddol gweinyddiaeth mewn perthynas ag etholiadau yng Nghymru yn amrywio rhwng £500,000 a £1.6 miliwn dros y cyfnod 2018/19 – 2022/23.

Fel sy'n wir am yr holl swyddogaethau sydd wedi'u datganoli, byddem yn disgwyl i Drysorlys y DU drosglwyddo arian i dalu'r costau hyn. Mae'r union drefn ar gyfer penderfynu ar werth y trosglwyddiad eto i'w chytuno. Mae'r trafodaethau gyda Thrysorlys y DU yn parhau. Os bydd cyfanswm y costau yn uwch na gwerth y trosglwyddiad, byddai angen defnyddio adnoddau presennol Cymru i lenwi'r bwlch.

Bydd materion yn ymwneud â chyllideb y Comisiwn Etholiadol mewn perthynas ag etholiadau datganoledig yng Nghymru, ynghyd â materion gweithredol eraill, yn cael eu gosod mewn cytundeb rhyng-sefydliadol, y cyfeirir ato uchod. Disgwylir i'r partion yn y cytundeb gynnwys Senedd y DU, y Cynulliad, Senedd yr Alban a'r Comisiwn Etholiadol.

Rwy'n amgáu'r drafft diweddaraf o'n gwelliannau. Sylwch fod y gwelliannau drafft, at ddibenion dangosol, yn defnyddio'r enw ar y Cynulliad a nodwyd yn flaenorol fel yr un a ffeirir gan y Llywodraeth. Mae rhai o'r gwelliannau yn gwneud darpariaeth sy'n gofyn am gysyniad Gweinidog y Goron, ac fe fyddaf yn ceisio sicrhau hynny cyn gynted â phosib.

Penderfyniad Ariannol

Ar fater cysylltiedig, rwy'n ymwybodol bod disgwyl i drafodion Cyfnod 2 ar Fil y Senedd gael eu cynnal ar 9 Hydref. Gan gadw hynny mewn cof, rwy'n bwriadu cyflwyno'r penderfyniad ariannol ar 24 Medi, gyda'r bwriad o gynnal trafodaeth arno ar 1 Hydref.

Ymatebion i argymhellion y Pwyllgorau

Yn olaf, meddyliais y byddai'n ddefnyddiol cadarnhau'n ysgrifenedig ymateb Llywodraeth Cymru i argymhellion eich Pwyllgor, a rhai'r Pwyllgor Materion Cyfansoddiadol a Deddfwriaethol mewn perthynas â Bil y Senedd, yr amlinellais yn ystod trafodaeth y Cyfarfod Llawn ar egwyddorion cyffredinol y Bil ar 10 Gorffennaf.

O ran argymhellion eich Pwyllgor chi:

- Rydym yn gweithio'n agos gyda'r Llywydd i roi sylw i argymhellion 1 a 2 ar arwyddion a chostau llywodraeth leol.
- Mae argymhellion 3 a 4 ynghylch cofrestru etholiadol yn faterion ar gyfer Llywodraeth Cymru. Rydym wedi ymgynghori ar hyn, ac fe fyddwn yn cynnwys darpariaethau yn y Bil Llywodraeth Leol. Nid ydym yn bwriadu mynd ar ôl newidiadau pellach ar yr un pryd â'r rhai i'r etholfraint a diwygio'r broses ganfasio gan y byddai hynny, yn ein barn ni, yn creu risgiau sylweddol.
- Nid ydym yn derbyn argymhellion 5 a 6, gan mai materion ar gyfer awdurdodau lleol yw'r rhain.
- Nid ydym chwaith yn derbyn argymhellion 7 ac 8. Nid ydym yn ystyried ei bod yn briodol rhoi sylw i gyhoeddi gwariant ar etholiadau'r Cynulliad na ffioedd swyddogion canlyniadau mewn deddfwriaeth sylfaenol. Fodd bynnag, rydym yn bwriadu rhoi sylw i'r ddau fater mewn ffyrdd eraill.
- Bydd y costau y gofynnwyd amdanynt yn argymhelliad 11 yn cael eu cynnwys yn yr asesiad effaith rheoleiddiol ar gyfer y Bil Llywodraeth Leol.
- Rydym yn derbyn argymhelliad 12. Rydym yn bwriadu cynnwys amrywiaeth eang o aelodau ar y grŵp llywio adnewyddu democrataidd a'r is-grwpiau.
- Rydym hefyd yn derbyn argymhelliad 13. Fel y dywedais yn y drafodaeth Cyfarfod Llawn, rwy'n ysgrifennu heddiw i roi rhagor o wybodaeth am fy nghynigion, ac rwyf wedi gohirio cynnig y penderfyniad ariannol nes i ni gael cyfle i'w trafod.

O ran argymhellion y Pwyllgor Materion Cyfansoddiadol a Deddfwriaethol:


- O ran argymhelliad 4, gallaf gadarnhau y bydd Llywodraeth Cymru yn egluro yn ein memorandwm esboniadol ar gyfer y Bil Llywodraeth Leol sut y byddai'r diwygiadau sy'n cael eu cynnig i ddeddfwriaeth etholiadol bresennol yn edrych yn eu cyd-destun.
- O ran argymhelliad 6, rwy'n parhau i fod o'r farn y byddai o fewn cymhwysedd deddfwriaethol y Cynulliad i ddiwygio geiriau agoriadol adran 1 o Ddeddf Llywodraeth Cymru. Fodd bynnag, byddai'r amserlen ar gyfer sicrhau bod y diwygiadau pwysig hyn yn cael eu cyflawni yn ei gwneud yn arbennig o heriol cyflwyno Gorchymyn yn y Cyfrin Gyngor.
- O ran argymhelliad 7, mae'r rhain yn faterion ar gyfer Llywodraeth Cymru. Rydym yn cydweithio'n agos gyda'r gweinyddwyr etholiadol a'r Comisiwn Etholiadol drwy Fwrdd Cydlynw Etholiadau Cymru a fforymau eraill. Byddwn yn cyhoeddi gwybodaeth ariannol bellach pan fydd yr is-ddeddfwriaeth sy'n diwygio'r broses ganfasio yn cael ei gosod gerbron y Cynulliad.
- O ran argymhelliad 10, mae Llywodraeth Cymru wedi ymgynghori yn y gorffennol ar wella'r system gofrestru i'r etholwyr. Byddwn yn cynnwys darpariaethau yn y Bil Llywodraeth Leol arfaethedig. Ond fel y dywedais uchod, yn ein barn ni, ni ddylid symud ymlaen gyda newidiadau pellach i'r broses gofrestru ar yr un pryd â newidiadau i'r etholfraint a diwygio'r broses ganfasio. Byddai gwneud hynny yn peryglu uniondeb etholiadau datganoledig Cymru yn sylweddol.
- O ran argymhellion 11, 12 ac 13, mae Llywodraeth Cymru yn creu grŵp rhanddeiliaid ac yn mynd i wneud yr hyn y mae'r Pwyllgor yn ei argymhell, gyda'r cafeat y bydd y gwaith yn ehangach ei gwmpas na'r hyn sy'n cael ei awgrymu yn argymhelliad 12. Rydym yn awyddus i gynnwys amrywiaeth mor eang â phosib o rhanddeiliaid yn ein gwaith ar godi ymwybyddiaeth am y newidiadau i'r etholfraint sydd i'w gweld yn y Bil hwn ac yn y Bil Llywodraeth Leol arfaethedig, ac fe fyddwn yn cyhoeddi'r cylch gorchwyl a'r cynllun gwaith ar gyfer ein grŵp ymgysylltu â rhanddeiliaid yn y dyfodol agos.
- O ran argymhelliad 14, bydd y Gweinidog Addysg yn cyhoeddi datganiad ysgrifenedig i amlinellu'r ddarpariaeth o addysg wleidyddol a dinasyddiaeth ledled Cymru o haf 2020 ymlaen.

- O ran argymhelliad 15, mae'r rhain hefyd yn faterion ar gyfer Llywodraeth Cymru ac fe fyddant yn cael eu hystyried fel rhan o broses y gyllideb ar gyfer 2020-21. Gan y bydd yr ymgyrch codi ymwybyddiaeth yn cwmpasu ymestyn yr etholfraint ar gyfer etholiadau'r cynulliad a llywodraeth leol, rwy'n ofni nad yw'n bosibl pennu'r costau a ysgwyddir ar gyfer pob etholiad mewn ffordd ystyrlon, ond byddwn yn ystyried a oes unrhyw wybodaeth arall y gellid ei darparu i roi darlun tecach.
- O ran argymhellion 16 ac 17, nid yw'r Bil Llywodraeth Leol yn gyfrwng priodol ar gyfer darpariaethau yn ymwneud ag atebolrwydd y Comisiwn Etholiadol. Mater i'r Senedd yw hyn, ac nid llywodraeth leol. Bil y Senedd yw'r cyfrwng cywir ar gyfer y darpariaethau hyn. Rwyf wedi gosod fy argymhellion uchod.
- O ran argymhelliad 18, rydym yn paratoi gwelliannau ar hyn i'w hystyried yn ystod Cyfnod 2 wrth ochr, fel y dywedwyd yn flaenorol, welliannau i ymestyn yr etholfraint i wladolion tramor a'r rhai ar y Comisiwn Etholiadol sy'n cael eu disgrifio uchod a'u hamlinellu yn yr atodiad i'r llythyr hwn.

Gobeithio bod yr wybodaeth uchod yn ddefnyddiol, ac edrychaf ymlaen at drafodaeth bellach gyda'r Pwyllgor yr wythnos nesaf.

Rwy'n anfon copi o'r llythyr hwn at y Llywydd, Cadeirydd y Pwyllgor Materion Cyfansoddiadol a Deddfwriaethol ac at Bennaeth y Comisiwn Etholiadol yng Nghymru.

Yn gywir,



Jeremy Miles AC

Y Cwnsler Cyffredinol a'r Gweinidog Brexit
Counsel General and Brexit Minister